

Proyecto di embeyecemento di Plasa di Gradicimento

Consul Colombiano: “Maneho di fondo lo ta transparente”

ORANJESTAD – Dia-domingo mainta a tuma luga un accion di limpieza riba Plasa di Gradicimento situa dilanti di PriceSmart. Esaki ta e prome step di un proyecto

di embeyecemento di e plasa aki cu Consulado di Colombia na Aruba conhuntamente cu Asociacion Amigos di Colombia (Asocol), y diferente instancia comercial y comu-

nidad Colombiano lo bay realiza proximamente.

Siman pasa, Consulado di Colombia na Aruba a realiza e presentacion di e bunita proyecto aki cu eventua-



almente lo uni e plasa aki cu Linear park. Na añanan 2005-2006 e plasa aki a wordo lanta pa Asocol como un gesto di gradicimento na e comunidad di Aruba en general. E plasa a wordo dorna cu un monumento di e Condor, un parha emblematico di e Andes di Colombia y Latino America. Y awor nan lo kier modernisa y haci mas bunita y agradabel e area publico aki. Proyecto

Durante e presentacion aki, Arkitecto Paula Lopez di e compania Zulo Arquitectos a informa cu e embeyecemento di e plasa aki lo costa alrededor di 280 mil florin. Aunke actualmente un 50% di e plasa aki ta cla, ainda mester di mas inversion pa haci e mas bunita y funcional.

E plasa lo tin 1800 meter cuadra bon adecua cu area di recreacion, gymnastiek, fontein, un stage pa realiza actividadnan, y un concepto arki-

tectonico di espacio publico bunita y funcional. Actualmente e proyecto aki ta den man di DOW pa su debido evaluacion.

Transparencia
Consul Colombiano na Aruba Sra. Mirza Gnecco a bisa cu e proyecto aki ta uno di e comunidad Colombiano en general y di tur empresa y ciudadano cu lo kier brinda su contribucion.

Tin pensa di instala un comision no solamente tecnico sino administrativo cu lo ta encarga di organisa e actividadnan necesario pa recauda fondo. Nan lo informa despues riba e actividadnan cu lo wordo organisa pa recauda e fondonan necesario. Tambe lo bin cu un sistema di control y transparencia riba maneho di e fondo aki.

“E fondo aki lo wordo maneha cu absoluto transparencia”, asina e diplomático a bisa. □